

愛吾廬稿



醉園詩存卷八

廬陵懷古

川似青螺圍半郭洲如白鷺對重城江山自到廬陵異人物多傳
宋代名東觀文章推永叔南朝風節重邦衡兩間正氣千秋塞後
起孤忠莫與京

詠鯉

浩蕩江河氣已鍾由來池沼本難容偶經鮒輒原非鮒一躍龍門
便是龍為避機心香餌淡誰探錦腹尺書濃殷勤寄語臨淵者莫
愛吾廬稿

卷之八

醉園詩存

一

當觀濠玩意供

秦烈婦行

會稽秦梅軒

以鼎

婦章氏於咸豐辛酉死粵寇難君時為

南豐丞越歲乙丑與余同客廬陵乞余詠之

今年我作螺川客裙屐聯翩共吳越中有秦君潘岳流悼亡語我
黃門厄君比黃門悼更深可憐君婦委兵塵無瑕白璧酸心碎不
是癡傷奉倩神昔時狂寇江東入一官貧仕君方急綵棒初宜北
尉猷瓣香正莅南豐邑君去家山隔渺茫豈知護草萎高堂牛眠
未獲先靈妥冢突旋驚逆寇狂此時板屋人情沸移家共想桃源



避烈婦因呼季子謀堂前姑柩安能棄同心娣姒柩爭扶舉瘞荒
阡墮自鋤臨穴淚枯眶血漬營墳力弱喘絲麤漸聞動地喧鼙鼓
義兵更勸公孫舉村內方看白馬從道旁早見蒼鷺舞一戰再戰
連敗摧千家萬家被殘虜烈婦守身志慨慷叶夷然白刃飲鋒鋌
妾生肯把夫君辱妾死還爲兒女傷三春桃李飛紅雨六月芙蓉
殺黑霜閨閣竟成魂魄毅道途長播姓名香于今境隔滄桑改孤
雌塚樹羞連理輜軒采錄彤管褒從茲志乘流芳矣我聞斯事尙
酸辛我亦流離天寶人感慨吟成權作記千秋還以附貞珉

寄贈高叟郁文時叟以寫意美人畫幅續寄

愛吾廬稿

卷之八

醉園詩存

二

其向螺川作客遊飄然李郭竟同舟見君晚更知君晚三絕原來
顧虎頭

相逢臭味輒相聯石上三生定有緣論齒君應增我倍交同張陸
竟忘年

妙擅丹青索繪難獨余慨贈當金蘭

君畫有乞之者輒不應
余未請卽先贈一幅

偶然

王宰兼能事莫作尋常畫史看

年少常擔客思孤愁多那得病魔驅殷勤周昉知余意消遣貽來

仕女圖

此次畫刊
余適抱疴

螺髻囊紗絕點埃薄蟬霧鬢影微開牧之曾作揚州客妝派圖中

省識來君廣陵人所畫亦皆廣陵妝派

駢邑由來一奪輕區區紙豈惜宣城笑他乞畫成余畫惆悵臨叩

馬長卿君書言作畫時苦乏佳紙竟以酒肆陶君乞畫宣紙畫就寄余

纔覺披圖喜欲狂更看手札意蒼茫如何同作荊州客猶是相思

各一方

憐余癖好竟成癡得隴常榮望蜀思恨不朝朝同一室倩君作畫

我吟詩

炯村雜興

元瑜書記筆初停算握司農未慣經入幕身偏離解舍征驂迹偶

愛吾廬稿

卷之入 醉園詩存

三

駐郊垌余本掌書記居停免赴村解代覈催科事僕成野馬飛揚性吏帶寒鴉瑟縮形

且喜養疴無俗擾不須謝客戶重扁

積薪儲米計偏忙自笑何曾慣住鄉味少盤飧堆首蓿價高村酒

滓糟糠居猶乏竹奚論肉園本無蔬豈夢羊村中雖欲蔽菜根亦不得若欲求

魚緣木似手彈馮缺枉教長

寒士生涯稱食貧幾曾鼎俎紛紛陳溪毛固是山中少菜把偏於

野外珍溫飽平生羞此志安閒隨地樂吾身須知同輩豬肝累日

午官廚始舉薪

菊花清瘦老梅癯憔悴風塵七尺軀身悔唐勤賈蟋蟀心耽楚隱

鑿蜘蛛偶拈霜葉題詩句閒步雲林入畫圖似此離人成獨立可
容故態誚狂奴

習靜空齋見道心況多野趣拓胸襟山谿響斷流泉汨村巷人稀
落葉深興至偶然成獨賞病餘曾不廢狂吟莫因作客生惆悵此
境原堪當入林

遐觀俗慮一時刪道上林邊自往還目送行人多擾擾心隨啼鳥
共閒閒無風落葉經冬樹不雨含煙薄暝山正好丹青圖此景何
當妙手倩荆關

戲詠所居村景報高叟郁文

叟先圖其陂
頭村景寄余

愛吾廬稿

卷之八

醉園詩存

四

檐覆茅亭昔市茶孤單鄰里止三家對門敗屋煙封竈繞舍深溝
水退沙四面遠山圍疊嶂兩頭通道走征車春來宅有桃花漲冬
裏田無菜甲芽南北參差雲樹合東西大小石橋斜偶過沽客提
壺醉羣集農氓納賦譁笑我難傳摩詰畫報君非爲樂天誇要煩
代把丹青補著箇吟身看晚霞

代簡寄禹庭弋香湘九兩弟

依人長歎雁行疏羨爾庭闈侍起居在趾兄慚虛內則聱牙兒想
畢尙書一家骨肉祈無恙兩地音容思有餘蘇桂炊珠良不易艱
難生計近何如

佳節頻逢定憶吾不徒重九插茱萸謝池夢醒春將返姜被寒深
歲漸徂蘭護嚴霜凋葉否梅過大雪孕花無新詩聊代魚書寄漫
說琅函字字珠

寄諸妹

學吟佳興近何如問訊將詩託鯉魚憶妹自題工部句思兄應盼
大雷書清風致足希林下詠雪才宜賭繡餘更想咨嗟人異雁一
行飛不到庭除

寄內

別後身疑隔絳河妝臺安否近如何禦寒衣可裝棉厚寄遠詩應

愛吾廬稿

卷之八 醉園詩存

五

疊稿多兒性聰明知憶我女年嬌小最憐他食貧莫怨遭逢齋蔗
境還留後日過

歲暮歸來計尙賒休占鵲語卜燈花平安聊復堪相慰餐飯還能
強自加未免有情當作客明知無益罷思家長卿近不形消瘦惟
爲吟詩略瘦些

冬夜把卷偶成

搢頤兀兀對芸編寒逼銀缸夜未眠已分功名於我後還爭學業
在人先甫將作雪聲偏碎風到鳴條力更顛棖觸枯腸芒角起呼
童煮茗淪清泉

皋望

遣悶東皋步新詩觸景成水清都有派山小半無名望眼家書滯
閒蹤展網輕野人休屬目我是一儒生

寄次園弟虔化劉刺史幕

別後相思半載遐一般遠客久辭家嫁衣總為他人作共被何堪
我輩賒蘭蕙香多接閩碗篔簹翠密護州衙遙知虔化風光好比
似螺川定足誇

阿兄隱迹近村農除卻題詩事事慵覓句每同瓜蔓引抽思難任
繭絲封不辭杜甫吟逾瘦惟惜鍾期聽未逢為問多英劉表幕賦

愛吾廬稿

卷之八

醉園詩存

六

才可得聚萍蹤

錄近作郵寄次園戲書一絕於函角

不是梅花隴上枝平安竹報慰吹簾途中驛使休開看封有塗鴉

一卷詩

系書寄金桂孫

桂孫初娶常熟蔣氏後又於江右贅武進黃氏今兩美已合仍依黃氏居焉余書戲嘲之

今摘數聯云外黃之家君作贅拜僕僕非無由青溪小妹
我同宗媚卿卿良有以伊昔情同扁馬既愧負愆于今範
嗣梁鴻亟思補過蓮花出水堪疊為品字之形桃李成蹊
當併作不言之馥添到尙書半臂無分冷煖之情畫來京
兆雙眉勿異淺深之樣務使內無怨而外無曠作我周旋
宜防受常畏而與常驕為郎憔悴越人樽俎漫憎饒舌豐
干作爾藁砧當
效點頭頑石

久斷音書隔樹雲起居遙想致欣欣繡幃鴛偶英皇並錦祿麟兒
爲衍分賦豈江淹才或盡詩如周赧債何紛君曾搜余昆仲瑣篋
同唱集約能和集中
蝸蝓等詩則贈之
既而並成逋負杜陵雖瘦吟逾富飯顆重逢欲詫君

寒夜不寐

竟夕不成寐窗穿冷透牀龍僵半潭水雁墮一樓霜雜念紛紛起
殘更故故長誰家鄂君被暖護錦鴛鴦

夜吟書臺以玻瓈方鏡鑒硯對影戲詠

空齋傳侶寡獨客無主賓良宵惜孤詠覲面來吟朋不請適然至
宛似相識曾書卷擷秀氣目朗而眉清有如歲寒梅瘴瘦皆精神

愛吾廬稿

卷之八 醉園詩存

七

又若琉璃天飛仙象外身相見不爲禮坦易率天真我視亦含睨
我吟同啟唇我喜輒微笑我倦隨欠伸敬之亦不驕慢之亦不曠
遺之亦不去引之亦不親意謂誰者子乃與我忘形舉念彼已知
嘖然語前陳勿問我爲誰但問公何人

櫛髮有感

余髮素脩澤立而解之委地半尺有奇自經庚申之難困
阨憔悴遂始隕落比歲已退十之四五然今春猶能及地
秋冬後零落踰恆不及地者倏幾三寸且有星星白顛豈
三十日壯纔增一歲便遽衰乎亦貧窮憂患有以促之耳

貧窮骨相一無奇散髮偏能委地垂可奈流離方壯歲也成零落
欲衰時先秋病葉林梢脫不夜微霜草末滋白去何曾有公道貴
人頭上總饒遲

懷里門殉難親舊絕句各有小傳

并序

形銷草露陸機成歎逝之篇跡化埃塵庾信有傷心之賦
沉乎紅羊劫起無辜罹丹地之災白雁謠傳有問惜青天
之啞錦繡繁華世界盡被摧殘詩書禮義門庭都遭殺戮
草凝忠血千秋萋叔銜冤花肖貞魂萬古虞姬含恨信人
生兮至此實天道之難論溯自蒼梧寇突氛惡楚邦白梟

愛吾廬稿

卷之八

醉園詩存

八

兵譁土崩吳會枌榆慘目萬家荼毒幾空桑梓酸心十族
瓜抄殆盡或年高德劭結纓追季路之風或魄毅鬼雄揮
戈墜魯陽之日或罵斷臬卿之舌口尙喃喃或怒捐先軫
之元面猶懍懍或甘心餓絕首陽羞掇薇餐或瑣尾逃亡
身後難求藁葬或慘連黃口一門之雞犬靡遺或烈著紅
顏同室之鸞鳳忽折凡此成仁取義保節全貞男兒旣無
愧鬢眉婦女亦何慚巾幗僕也情深感舊誼篤所親歎萬
萬之支衰啜其泣矣悵葭葦之戚盡能不悲哉愧當年室
徙巫臣手援莫及歎此日魂招宋玉腸斷難禁爰就吟窗

略陳篇什相連千百難並傳梗概姓名約舉二三實專誌
生平品學敢詡詩兼史筆第抒積憤之懷倘教錄附輔軒
或助流芳之色況數徧春風絳帳半緣追念師恩恰吟成
夜雨青燈一晌如聞鬼嘯

業師路封巖明經

公諱元暹生平敦孝友尙氣誼學冠時流累薦不售舉
明經年八十猶以校文鬻字爲業雖樵夫牧豎無不知
公名者萼仲弟彬若婚公女孫故皆從公受業避亂鄉
居猶爲校閱課文後竟闔門死難

愛吾廬稿

卷之八 醉園詩存

九

耄耄罹災歿後昆達觀生輓事難論公有預製自輓詩惜歲久不能記誦千秋翻羨
黃巾好未忍兵加通德門

受業外舅儲啟齋學博

公諱炳煥庚申三月舉族起義累挫賊鋒卒以援絕潰
敗罵賊死事詳三卷哀詞序後公夫人周復罵賊遇害
一門盡焉萼爲公及夫人知愛期望異於他壻卒之危
不能救死不能弔飄零壯歲一事無成能無痛乎

一瓣香傳儲詠詩

公著有天香樓詩詞集亂後萼所掇拾僅詩七十篇稍裕當梓以行世

可憐傷國

并無兒白頭衰婦亡尤烈慟絕黃泉見面時

從父雨蒼增廣

公諱恩溥與伯兄霞城諱起皆茂文行爲膠庠國瑚而公尤卓卓屢躋棘闈時論每爲不平公課徒食貧寡如也公同氣三人惟季弟性桀驚然死難後亦有遺嗣獨公竟爲若敖且不知委屍何所云

昆季稱良推伯仲最良公似白眉單一般慘死魂尤餒天道無知作善難

受業世長徐德輿明經

公諱坤載道光己酉副車父魯埜諱星煌樸質孝友少

愛吾廬稿

卷之八 醉園詩存

十

不得志於名場遂棄舉業專意臨池者三十年書法與路封巖師齊名萼家君嘗及其門故萼昆季以世家子受業於明經聞死難後惟一子龍鼎存是萼所親密切磋者然子身飄蕩不知今客何所云

兩世通家徐孺子功名未竟一身捐如絲膽有書香嗣飄蕩江湖信莫傳

儲秀玉女史

女史爲內子第三妹性貞淑因鮮兄弟願不字終身以侍親家難後周夫人以時方多故強爲擇配聞草草于

歸未幾賊至自沈於水幼固敏慧未笄時內子誦其學
吟一絕落句云鶯聲滿院落殘花余歎其清俊而疑其
不祥然孰知竟填滄海之劫乎悲已

劉家三妹最清華一賦桃夭隕水涯慘憶學吟清絕句鶯聲滿院
落殘花

統懷各親舊

里門之復也萼旋歸甫一日以兵盜不靖田舍已墟隨
卽渡江而北戚族中死難事實尙多未知其無文行可
傳者總敘一篇以歸簡覈其有可表著者當俟採實補

愛吾廬稿

卷之八

醉園詩存

二

入焉

九族嫻親喪亂離抄連瓜蔓少留遺數篇吟就腸幾斷安得人人
各有詩

懷生平師友知己絕句各有小傳

并序

夫偶違今雨杜陵縈朋舊之思暫隔停雲粟里動友生之
誼況乎搏沙一散終身無再見之期題石三生屈指杳重
逢之日想月梁之顏色死別固已吞聲瞻雲樹之音容生
離亦成永訣者哉僕十年就傅廿載論交託性命於詩書
締因緣於文字或絳帳受傳經之業馬鄭相遭或紵衣酬

贈帶之歡札僑獨契或鞭隨子長附驥尾以遨遊或炙啗
義之託牛心之知遇或琴操山水邂逅牙期或舟泛江湖
聯翩李郭或忘年而降德陸張成介石之交或略分以言
情管鮑廣分金之誼甚或風塵物色來邯鄲挾瑟之倡雲
水飄零遇河間數錢之女然而星霜乍易日月纔移頓成
今昔之殊大有存亡之隔程門已渺徒悲立雪之蹤謝墅
兼遙空灑臨風之涕李長吉天邊作記白玉樓成卜子夏
地下修文黃泉路杳縱偶存碩果大都漸逼桑榆況永斷
尺書無復相投桃李至若天台誤入乏胡麻一飯之緣巫

愛吾廬稿

卷之八

醉園詩存

三

峽長晴絕楚雨三更之夢回溯花風盡盡我豈關心相窺
萍水悠悠彼眞俊眼衷藏莫罄應銷翠袖之魂腸斷誰知
未寄紅綃之淚見玉簫於再世事本荒唐思錦瑟於華年
情宜悵快今日者子身作客舉目寡儔等一夢於莊生觸
四愁於平子凡屬明師益友誼同而感亦皆同卽分貴介
賤流分異而情無或異爰書小什各述生平更弁微言略
詳體例悵此日鮮逢知己徒歎勞勞幸吾生稍解識丁肯
呼負負聊同向秀成感舊之諸篇並比江淹作恨別之兩

賦云爾

同里吳月棠文學

君諱芳余父執也性曠逸工詩詞及齊梁小賦兼精鐵筆累試卒困童軍歲王子家君赴官江右君偕投所親途中與啟齋師晨夕唱和時余專習帖括心慕之不敢吟君輒慙恧之舟至滕王閣挈余同上賦詩一篇勸姑試和余勉應之有多才王子堪重遇愛士閻公不再逢之句童穉口角輒蒙歎賞謂子髫齡吐屬如此不數弱冠子安也因而蕉葉端溪硯及手鐫印章獎余又購詞譜爲講倚聲法明年君失意歸余亦繼返出奚囊一帙

愛吾廬稿

卷之八 醉園詩存

三

質之君爲評隲甚詳後三年遽赴玉樓年未四十且無子

少小同舟吳季子滕王閣上許知名十年玉樹臨風謝安得論詩起九京

業師同里陳朗山明經

公諱錫光一字閻散少以神童名年十二邑試冠軍遂遊庠垂髫卽食餼博覽多識殆過陸氏書厨文筆汪洋恣肆卽應試律賦未嘗不揮灑千言風簷射策必徵實靡遺羣目爲天才先後省闈十餘薦不售以明經終著

述宏富衷然成書者十餘種其他詩古文詞皆浩如煙
海制藝亦積至五千餘篇因貧不能梓常自歎述作過
多爲累萼兄弟遊公門最晚公已衰甚然教誨期望恆
異於他生己未冬公年七十餘無疾遽卒明年寇至居
室被燬遺文亦俱灰燼矣

海內文宗陳伯玉可憐白首老明經算惟一死邀天厚未墮郊原
劫血青

餘姚俞采葑明府

公名潘以名孝廉宰新喻家君郡同僚也制藝絕時歲

愛吾廬稿

卷之八

醉園詩存

十四

丙辰樟樹官軍敗績萼衣裝俱盡還寓南昌家君督之
作文就正於公公頗獎許至抉摘瑕疵亦不少諱必爲
盡改而後已然萼以襁褓故迄四月竟不能一謁謝公
亦知之雖過家君遊不強見也比萼南旋公寓書家君
必問萼學程及應試得失後以不善權務投劾去今年
踰七十存亡不可知矣

種成桃李西江滿身返陽明小洞天惆悵平生無半面絳帷遙隸

一彭宣

朝陽叢瀛石太守

公名占鼈原籍山左以乙科宰江右者三十年歷著政
聲歲壬戌余司記會昌公以贛州守行縣令尹掃廨以
待同人雜撰楹聯署之公至獨賞余作余因贈詩四章
公踵韻以復推許過情復以其偶吟零草屬題後同人
作探梅詩易書呈校公又適賞余作嘗屬代書鄒孝子
割股詩有一字未善余徑爲易之公極口謝稱爲一字
師返郡後徧爲延譽僚佐有捧檄來者必寄聲問起居
初公行縣時縣尉某有貪黷聲公每見必加呵斥將繩
以法前後四令尹及公幕佐並爲緩頰終不許適羣和

愛吾廬稿

卷之八

醉園詩存

五

探梅詩尉免余代作呈公公避賞之勉以改作循良吏
無負此才公固無日不誦余世界冰霜老心腸鐵石春
二語至是復兼誦尉作吟香口角春不置蓋愛才其天
性也嗣余解館過郡入謁公方抱疴刺入強起延見堅
留小住余以急欲歸省謝之自是不復通問今遇友自
虔來者言公已遷觀察謝病歸當時每見必詢余蹤兆

云

今古達流叢姓少日禪苗裔數公奇

公自言族爲金日禪後

下交曾辱忘年

契感勝逢人說項斯

金華朱子欽職方

君諱允成貌清癯玉立弱冠舉於鄉兩上春官不第以親老急欲顯揚遂入賞爲郎後遭父喪歸避亂江右歲癸亥余從戎白下君亦赴座主曾節相幕萍水連航遂以詩文相契出稿互加丹黃手錄余作數十篇存之君詩宗浣花七言古獨神似長吉居恆研理學嗜古文所至流覽山川指顧悉其形勢陰以知兵自命舟至皖江珍重言別深以努力青雲毋蹈終南捷徑相助詎明年三月返棹訪君則已歸道山年三十七耳

愛吾廬稿

卷之八

醉園詩存

六

功名未顯留侯業仙去胡然訪赤松增我平生知己慟翻嫌當日過萍蹤

武定李嘯山都轉

公諱作士工書法弱冠以廷試選拔前茅授江右令與家君先後官新淦後以軍功洊擢都轉總軍饒理檣臺歲癸亥家君宅憂困甚公以絕裾之義強致之并萼作曹邱書分薦大將戎幕萼入幕甫半月公已三致書迭爲延譽屬善遇之後父子皆以不合去公餽贐良厚明年復建業公方得優賚遽以染疫卒於軍

家世幸傳清白志赤貧傲骨未能柔平生恥受綈袍惠惟感神仙
李艷侯

無錫女

女名巧字笑倩未詳其姓綺齡豈蕊玉貌芙蓉以清歌
侑酒者其類也賤何足懷且懷之而列於師友鉅公之
後不已褻乎曰不然良賤雖殊知已則一余乏潘安之
貌石尉之豪又清揚邂逅之時未嘗爲華父之目逆彼
獨竊竊然慕而志之是其情之癡識之謬有足感者歲
己未余客經惠山遊焉時桂花盛開士女雲集女適在

愛吾廬稿

卷之八 醉園詩存

七

因覩余而余實未覩是夕有延陵氏以其子客家君幕
遣僕招飲余不知其在曲中至則女所女詫爲奇遇悉
述余日間衣飾及遊息處皆昭合且曰兒見君翩翩絕
塵知必佳公子竊深愛慕慮終不蒙一顧耳因密言願
及未汗拯之爲韓氏柳枝余以家範嚴且乏藍橋杵曰
謝之女歛歔欲復有言搗適內喚之女出惡聲怏怏入
余未別遽行女追送至門重含幽怨明年遂遭寇難云

風塵謬許佳公子慧眼靈心感雪兒采得三生紅豆子教人入骨
種相思

詠懷有序

僕閱歲飄零遭時喪亂窮途欲哭不同南阮之狂舉室含
飢大有東方之歎悵雲路鵬程之渺渺空負識丁感雪泥
鴻爪之悠悠鮮逢知己于時愁生作客念切懷人既抒積
憤之懷忽悟浮生之理幸青山猶在怕沒柴燒想綠樹能
培自然花放九疇八卦何須演彼陰陽五角六張大抵隨
人向背達則置身廊廟伊傅崛起商氓窮則抱膝巖阿管
樂高吟梁父悔廢學已辜昔日曷不做一日僧撞一日鐘
論服官猶早廿年尙堪讀十年書養十年氣爰成四律用

愛吾廬稿

卷之八

醉園詩存

六

志一銘寄語同人共廣和汝

升沈已定漫神勞且付狂歌飲濁醪狗監羞因楊意貴龍門肯附
李膺豪漁樵丁卯三生集蘭芷庚寅一卷騷他日關山傳錦字會
看織繡上弓弦

曾隨司馬賦南征依舊歸來襍被輕蘇子說秦原失策陸機入洛
枉知名白衣蒼狗須臾態紅粉青衫遲暮情靜裏思量翻自笑何
如撇卻吏心清

世情物理喻年年萬事惟應靜聽天花到開遲偏耐久月當缺後
始成圓美人顏色承恩顯名士文章得第傳解識南華真妙諦善

忘能一笑蹄筌

元龍豪氣漸銷除喚馬呼牛一任渠直口易遭當世忌平心且讀
古人書原思履決貧非病顏子瓢空樂有餘養得干霄清白志也
應造物肯憐余

禽言 補亡有序

余作懷人詩成日晡朗誦適聞姑惡鳥鳴因憶少時有禽
言八首爲朗山啟齋兩夫子所稱賞亂後稿亡僅記首篇
煞句云爾不歸去喚誰歸去詠杜鵑也餘屬何禽言今并
忘之中懷悵觸率復足成仍先子規以存原句卽次姑惡

愛吾廬稿

卷之八 醉園詩存

五

以寄曾通其他任杼機袖非敢諷世但求切當而已然吟
成淒楚安得起兩師而再質之乎

不如歸去青春欲暮嗟汝杜鵑空嘯未悟聞汝乃望帝之精英一
朝失國式微中路魄化空山魂應戀故胡爲乎越崎嶇蜀道之蠶
叢而迷此天涯之芳樹爾不歸去喚誰歸去

姑惡姑惡姑實不惡女婁婢媛申申謠詠飢不得餐寒不得著勞
不得休賤務雜作本鳳翽之聲和奈鶯簧之響錯脉脉心傷嗟嗟
命薄何怨於姑兮何恨乎女婁之虐

一百八箇一百八箇鶻突呼來分明勘破利鎖名纏脫身高卧夕

梵晨鐘捫心寂坐杵下蒲牢一百八箇珠數牟尼一百八箇
得過且過人生幾何富貴雖好憂患較多幾輩名成鬢髮空皤何
如貧賤嘯傲煙蘿尊中有酒得過且過案頭有書得過且過
提壺盧日日呼杖頭錢少懸青蚨年荒米貴不易沽空勞澤畔譏
左徒獨清獨醒胡爲乎提壺盧壺提無

泥滑滑易蹉跌苦口呼君爲君說征人道上下雨樵子山中雪一般
難行步休劣宦途更有風波生不徒泥滑嗟難行卻是耕夫犁雨
好春田水淺憑滑倒

行不得也哥哥哥哥何事行者昔重瞳兮南征拋二妃兮獨寡望

愛吾廬稿

卷之八

醉劉詩存

三

蒼梧兮魂騫倚斑竹兮淚灑花落黃陵啼聲欲啞願哥哥兮鑒之
返征橈與征馬江上風波行不得也道上風霜行不得也

壓油壓油嗚傍高樓樓頭貧女顧影含愁飛蓬歷亂膏澤難求不
見無鹽刻劃偏優繫彼采蘋梳洗全休吁嗟壓油兮安得盡壓爾
油而潤天下美人之頭

許小姑行

有序

小姑錢塘人母故倡父千戶某納爲側室後以嫡亡遂卽
正焉千戶卒不安於室女幼字同里某氏亂後音問梗絕
悼母失行且懼污及深自閉匿時復伴狂警之後有陳典

史誕其色知不可亂乃與母私約將潛委禽妝女偵知僞
爲歡笑也者母弛不復防卽日遂雉經死初余鄉人某與
千戶嘗同僚假解宇居之故聞其事詳今埋玉已三載惜
其泯沒不傳爲作許小姑行

隨園昔詠孫秀姑秀姑烈冠錢塘姝今日相違百餘載又見錢塘
許小姑小姑父宦西江上中道靈椿忽凋喪少小媼盟隔亂離彭
郎未嫁空遙望可憐堂北萱難樹行雲身是巫山女愛逐襄王夢
裏遊不似小姑甘獨處小姑脉脉暗神傷念切終天抱恨長無言
自隱凱風怨有意常嚴多露防佯狂時復頽魁巫詭作魂憑伯有

愛吾廬稿

卷之八

醉園詩存

三

呼要使艾豨驚遠遁免教眾口謗婁豬閨閣身如火際蓮藏形匿
影自經年料應忍死非無意温鏡思同徐鏡圓於陵子仲真堪殺
狂蹤竟想鴻溝越渭涇清濁知莫淆隴蜀兼并計潛發牝麀聚豈
隨雄牡妄擬雙鵬貫雛母說合鴉孃遣鳩媒謀成強奪秋胡婦暗
度陳倉不許知偷從隔幔引紅絲靈心猜破鄰兒訊鶯語東風漏
泄時歡顏謊啟菱花照嬌羞豔整芙蓉貌誘使提防頃刻疏紅羅
宛轉香喉繞芳魂一霎罡風送玉蓮應返瑤池種人驚蛇腹產蛟
龍我惜鴟巢墮鸞鳳歎息埋香三載餘貞珉未見墓前書夏姬別
逐申公去鄭黑誰加子產誅風人義合彰幽烈流傳敢任篇章缺

雌兔雖經窟宅移，雄狐尙玷衙官列。安得詩陳風憲知，俾共秀姑
冤一雪。

自嫌書稿字法未精，漫題一絕句。

不耐臨摹向墨池，天教膏彼或豐茲。由來絕藝兼長少，摩詰書原
未稱詩。

詩境自述

不論家數兼時代，意本羣師籟獨涵。涵味美於回嘗諫，果絲成自縛
笑靈蠶。篇多願任黃金少，思苦吟添白髮甘。博得肌消眠食減，此
中功候廿年參。

愛吾廬稿

卷之八

醉園詩存

三

歲暮書感

百感紛乘四序移，浮生三十一年時。衰同蒲柳姿先悴，清比梅筠
格自奇。湖海氎寒偕出處，風霜裘敝賴扶持。羈棲歲晚成何事，贏
得他鄉鬢欲絲。

半生遇合總無緣，百不如人祇自憐。白日易過成壯歲，青雲便到
失華年。已嫌錐處囊中後，敢盼棋爭局內先。箸圍鑪忘撥火沈
思時，復一觀天。

星霜閱歷慣天涯，一事無成枉歲華。貧後心原甘作客，別來夢總
未離家。情惟骨肉眞難忍，生僅形骸不是賒。幾許蹉跎悲往日，何

當缺陷補靈媧

生意隆冬百物韜陽和煦育待相遭寒多暑少風何悖積易消難
雪自牢處晦英雄惟善忍得時豎販亦能豪枯榮轉易須臾事眞
宰茫茫意任操

高叟郁文得余贈詩復爲作美人圖闋日得余長律卽爲懸

繪尺幅各附詩函同日寄到喜甚吟興勃然一揮復得八

絕句卽日酬之

兼旬風雪霽初回黃耳書傳得意來怪底連聲乾鵲喜琅函詩畫

錦題開

愛吾廬稿

卷之八

醉園詩存

三

牡丹亭畔夢中人縑素勾魂妙有神但恐柳生緣尙薄虛勞得畫

喚眞眞

君書言畫時偶倦假寐觀一嬋娟告以柳生抱恙炯村
乞往調護既諾而寤遂摹其照寄余云云蓋簞言也

心病勞君作畫醫

君詩戲云我欲醫君心
裏病徧徵圍色到毫端

圖中人足慰調飢瘦吟

還賸韶年痼可有奇方并愈之

白描粉本賸吳娃爲惜秋波點未佳若使金鑷堪一刮丹青筆合

補安排

君附來一幅類吳門妝束意態絕佳
因點睛未流動棄未著色余甚惜之

遵詩懸繪卯橋居漏卻吟身豈是疏應盼蓬瀛高著我不教僻壤

混樵漁

陂頭休盼鬢頭香

君因偶過沽客
句有索酒意

我亦流涎渴汝陽報與昨吟詩

一句價高村酒滓糟糠

摩詰詩原在畫中休慚覓句未能工似余獨擅吟毫健不解丹青
缺陷同

藝事專長互品題相推相羨莫相齊求詩乞畫皆情累何似禪心
絮著泥

前書箠行

廬陵令史乞我書隆冬雙箠展如雪意重長官入幕竇詎知吾技
惟書劣藝事大都由天資書法文章詩賦詞短長優絀限分寸人
力不得而強施我於文陣頗能角筆勢奔騰氣雄卓名場屢蹶戰

愛吾廬稿

卷之八

醉園詩存

三

非罪宗匠師門稱善學賦才詞筆旁羅包吟懷更復耽推敲心肝
嘔入錦囊裏家人恒以詩癡嘲惟有臨池性所憚如被鬼神縛吾
腕明師規責嚴父贖金丹鍊骨終難換有唐詩畫推朝川書絕獨
不如鄭處我慚墨妙母乃似丹青並缺才尤偏因茲守拙心有餘
平生不解爲人書今日無端相強迫難謝不敏當何如抑吾罕譬
亦有說嫖母無鹽妍在骨書麤載以文義精未必人心樂輕忽拂
箠捉管書不辭且書且述成一詩令史莫作右軍想我是狂吟杜
牧之

後書箠行

書筆書陋華以詩一詩僅能書一筆筆既有雙詩合雙免仿來禽
青李帖情知此事由強爲一之已甚胡再而殷勤重違發榮請搏
虎之喻徒然疑況我吟懷恣奔放斗酒百篇意始暢急詠催成銅
鉢清狂歌擊缺玉壺壯論行限墨作短篇一筆詎足供吾顛固當
再接再厲乃卻愁無筆堪蟬聯難得令史適解事一時竟將雙筆
至想因日日聞豪吟乞書固兼乞詩意若言書拙慙更揮前途鴉
難離筆飛詩中況已自評跋妍醜無諱人誰譏令史令史聽我語
我更作詩書與汝書成莫被俗眼窺要示李白及杜甫明年障拂
炎威虐雙筆更番任君握但逢雷雨慎護藏句奇恐有乖龍攫

愛吾廬稿

卷之八

醉園詩存

三

又書筆行

世間豈乏善書人強所不能乃到我令史瑯琊實罪魁作俑爲余
賈斯禍書與兩篇書筆行雙筆入手喜且驚傳觀同輩卻歆羨窮
鄉搜箠如拽兵須臾雁鷺行以進持筆踵乞語卑順告以書陋疾
曰佳再辭色似瞋吾吝因茲會意諾以書賴我狂吟思有餘篇篇
自嘲卻不去須知非我千名譽呼童日研墨一斗人言我書頗不
醜今將大開乞書門門限裏鐵先宜我從牛角稱能文目視前
輩無青雲詎知難中試官意子衿早棄唐劉蕡詞章出入風雅騷
不屑瓦釜鳴嘈嘈虛名亦豈造物忌高山流水音徒操縱有一二三

知己儔大半類我皆窮愁其中達者多萎化北邙之坂腴松楸平生自恨作書劣猶以西子蒙不潔無端人情反嗜痴競乞紛紛乃不絕黑白顛倒悟自今姑乞姑書姑復吟吟成凡箒總書此明我終無書箒心

家嚴手書戒

不肖

勿以餬口生涯荒廢學業并舉去歲典江

右試之宗達子良侍御

彬蔚

行藏相助感愧涕零謹識五

絕句以自警責

鯉庭手札示平安讀能從頭更細看誰似親心鍾愛切沈思雙淚

不禁彈

愛吾廬稿

卷之八

醉園詩存

五

誠說飢驅志勿荒貧能力學始稱良吾宗十載依劉者今歷烏臺

白玉堂

青雲得失原安命有志終當奮讀書不責功名期學業知兒未達

忠才疏

離亂頻年學問温何時賦好獻金門卽今奮發酬親志抱疚猶辜

大父恩

家世由來顯一經榜花敢墮姓名馨三薰誠語千回讀勵志詩題

勸學銘

兵士箴

昔余嘗作安西傳，自有老兵無元子。偏裨雖貴爭趨風，甘爲布衣
屈金紫。一朝崛強爲鵠唳，花縣司記忘卑棲。催科虛席偶移置，投
荒乃受兵喧擠。大樹將軍歸衣錦，戈矛甲仗威風凜。紛紛隊伍錯
雜過，入門索食索豪飲。吏人帶笑前致辭，此非逆旅君應知。旣乏
長卿酒，堪貴又無漂母飯。可施薄言竟爾逢，彼怒拔刀勇甚敵。場
赴哮虎咆，熊不自疲捉雞打鴨。將誰懼，搜粟眞同都尉來。望塵難
向嫖姚訴，范甑奪作貔竈炊。皋廡占爲麟閣住，積薪苦少不足供。
敲斷珊瑚石，家樹鄉民避禽匿。二毛公家輸賦無一毫，自朝至肝
肝復暮實偏處此爭嘈嘈。喜我吟懷健，難頓汝曹未足乃公涸。放
愛吾廬稿

卷之八 醉園詩存

毛

歌夜半驚羣眠，非惡相喧報前恨。歌成實欲與汝箴，盍箝汝口啟
汝心。汝曹意蔑縣官小，謂茲况乏官鳴琴。豈知汝曹實莽鹵，此間
賦急非官取。縣官可蔑賦難蔑，欲入司農獻天府。

十二月十八曉起大雪是立春前一日

徹夜衾寒夢不成，凌晨窗白眼羞明。攬衣卻起開門看，滿地琪花
一尺盈。

天教寒極始生和，不惜工夫醞釀多。明日陽春今白雪，風光都入

鄧中歌

烹雪爲茶漫題一絕句

茗香和雪沁詩脾此味應非熱客知卻讓風流陶學士解人多得
一名姬

立春偶成

見說青陽頃刻回暗中拂柳更驚梅似茲梅柳全無地一樣迎春
來未來

歲暮旋署留題炯村齋壁

一歲惟餘七日纔春光先到暗相催已封鵲印官休眠如植雞竿
客赦回隔宿檢書歸篋筭凌晨襍被付輿臺空齋還復留詩別早
辦明年不再來

愛吾廬稿

卷之八 醉園詩存

天

八句小住足關情銘好何嘗陋室輕積日案頭多靜課暇時闕外
少閒行窗穿一綫天光暗燈駐三更月色明塵拂紗籠渾漫與問
誰重此繼吟聲

有感復書一絕句

客俸雖微品合貞敢忘暮夜四知情杜門三月人稀見卻被流傳
清白名

晨行

凌晨犯寒行笥輿載途速朔風透單幔刮骨戰膚肉豈知余畏寒
身尚羔狐服雖似晏裘故終異棉單複誰歟兒我馳襜褕輿夫屬

短衣不掩脛草履兜赤足衝風踏冰雪圖果一朝腹面僵涕直流
肩聳首全縮彼寒當何如欲止畏催促同此秉彝民詎無父母育
生命百不齊天心已余淑未逮狐貉居大勝牛馬僕靜念心轉溫
舒體斂肌粟萬事此類推知足良不辱

愛吾廬稿

卷之八 醉園詩存

五

醉園詩存卷九

宜興蔣萼跼棠氏著

太湖櫂歌

君不見湖山七十有二峰螺鬟沈浸煙波濃又不見湖水三萬六千頃鷗雛出沒雲濤靜山光水色連天悠對此欲溯鴻濛遊聖女祠邊理孤櫂臨風擊節歌吳謳太湖靈奧區吳越扁舟曾作鴟夷窟鷓鴣飛去錦衣空麋鹿遊終紅粉沒當時霸業亦銷沈誰向湖中弔隱倫甫里高蹤渾不見石湖遺蹟渺難尋卽今滿眼風光好泛湖莫惜秋將老笠澤蘊鱸味正酣洞庭橘柚香初飽十幅蒲帆愛吾廬稿

卷之九 醉園詩存

一

截晚風蘭山嘴上夕陽紅千秋湖上興亡事都付歌闌一笑中

伯牙琴臺

落日氣蕭森荒臺絕鼓琴七絃空想像百尺自登臨山水今何志牙期舊賞音飛鴻還目送杳杳暮煙深

任公釣臺

畫溪春水綠垂釣憶任公故址名猶在高臺蹟已空竿綸清俗念鉤餌警貪風緬昔臨淵日機心亦化工

九龍山望芙蓉湖

九龍潛九淵一躍一峰起天矯青冥間蜿蜒白雲裏壯哉目極龍

峰巔九淵茫茫盡煙水水光何處最空明芙蓉湖上芙蓉生安得
騎將九龍去手把芙蓉朝玉京

用太白句

題同學汪耐齋茂才尊人慕清明經殉難事略

儒生生而不遇時老死牖下何人知文章憎命亦淹沒惟有節義
留光輝君不見汪公墓清真人傑死重泰山名不滅昆池掃蕩劫
灰盡浩然之氣常疑結昔就外傳早識公假館曾依皋伯通公子
亭亭兩玉樹同堂肄業相追從聆公言論徵公行志在讀書學孔
孟杖杜無慚篤友于桑梓尤能矢恭敬賢人乃有龍蛇厄歲在庚
申寇氛迫烽燧連天焰徹紅戈鋌匝地光浮白公時徙家表瀆邊
愛吾廬稿

卷之九 醉園詩存

二

忽聞賊至心夷然魯連蹈海引高義屈子懷沙成水仙一家拌向
清流掉帶血子規聲絕叫死義死孝併死貞骨肉英靈自相弔迄
今滄桑隔幾秋長君避粵旋螺舟出公行狀淚沾臆屬余題詠彰
潛幽自愧才華非宋玉招魂楚些愁難續據事直書存其真采風
請俟輶軒錄長君長君且莫哀公之世德君能培他日寶庭榮五
桂耐齋有

五子

九京魂魄歡顏開

閱香祖樓傳奇有感偶題一絕

花鬢謫降記前因回首人天隔兩塵漫說幽蘭易憔悴女兒原是
可憐身

丁卯秋闈報罷示仲弟兼寄同人

兩載鄉關等客居，滄桑已渺舊田廬。
況經阮籍窮途後，更值劉蕡下第初。
遇合有緣真不易，文章無命欲何如。
天涯苦累庭闈盼，腸斷秋風強寄書。

明明雲路奮追隨，忽鍛凌霄健翮垂。
一瞬升沈偕雁序，半年榮悴

驗花枝

春間從兄曼蓀草創新居於庭前植西府海棠一本鼎立三株祝驗今科昆季三人得失後已萌芽二株詎南闈試

旋忽復

蛾眉枉學描時樣，後臂何能挽數奇。
不是微名難忍置，家

貧常恐報親遲

青衫憔悴兩同胞，身世艱難等繫匏。
說項真慙前輩譽

戴子和世長見余闈

愛吾廬稿

卷之九 醉園詩存

三

作逢人

汗顏祇畏俗人嘲，怨尤得釋惟安命。
悔各能平不筮爻，肯

為雞蟲生計較者，般妄念一時拋。

不信詩書竟誤人，直教無術可藏身。
情懷豈為功名熱，文字偏於性命親。
搔首自憐吳鬢短，低頭誰告阮囊貧。
卽今多少同袍客，一樣酸寒茹苦辛。

感憤雖除不解愁，離騷讀罷有離憂。
爨桐難入中郎聽，散櫟奚煩

大丘收霧雨，全欺黃菊藥風霜。
先做黑貂裘，迢遙尙盼京華信，策

獻元方志或酬

從兄試京兆

相思骨肉地，偏遐去住均。
難計尙縣空爲浮名淹歲月，那從迷路

覓生涯璞藏和氏終羞泣金盡蘇秦枉費嗟若到西江憑轍涸團
團畢竟是吾家

任說艱辛志勿灰花繁綠樹總因培滯留或者非無過閱歷能深
始是才真意靜觀天地得浮生翫視古今來自箴更與同人慰漫
把長吟比七哀

登科有記不須觀幾輩名書淡墨乾成佛願奢遲證果學仙功滿

定還丹

朝廷破格求才易庠序居奇食餼難

余科試第二序當食餼前人占缺九

年尙思壘斷余亦翫置之

惟望時清家小阜讀書隨分可相安

擬古閨怨

愛吾廬稿

卷之九

醉園詩存

四

桃李紛紛鬪臉霞眼中人去渺天涯故園拋得春如許卻向長安
去看花

團團羅扇自輕盈搖動新涼午簟清獨憶漢宮人似玉秋來捐棄
若爲情

月白風清星斗闌瀟湘千里雁聲殘離情恐被姮娥覺抱得鳴琴
不敢彈

爲憐鸚鵡憶歸秦放汝開籠去莫瞋臨別殷勤飼紅豆相思銜寄

隴頭人

賦得光添銀燭晃朝衣

漏盡承明曙色微
早從午夜換朝衣
玉鑪煙未攜雙袖
銀燭光先晃四圍
天上星辰移寶炬
人間燈火徹朱扉
搖紅欲閃吳綾紫
燒絳能翻蜀錦緋
隱隱紗籠薰蠟照
層層繡褶簇蛾飛
口含雞舌餘香襲
身傍螭頭瑞靄霏
柳染藍袍偏帶膩
花簪烏帽共生輝
遙知日近龍顏喜
赤芾金蓮拜賜歸

凌歊臺次丁卯集韻

宋武宸遊去不回
凌歊寂寞有高臺
青山雲影六朝沒
黃海雨聲千騎來
戲馬其留遺蹟在
射蛇空憶霸圖開
翠華蹤杳石頭路
行苑滿階生碧苔

愛吾廬稿

卷之九 醉園詩存

五

挈眷之靖安司記途中書感示內

入幕因陶令

陶青丞明府

辭家挈孟光
含愁征遠道
忍淚別高堂
舟小

炎威虐囊空
旅思長歸途
魂夢熟夜夜到南昌

作客男兒事
追隨強細君
窮途勞慰藉
旅食費殷勤
病體憐余弱
憂心累汝焚
何年共歸隱
耕織畫溪濱

夜宿賓館借內作

旅館雙棲夢乍成
風吹繁響忽然驚
起來仰視星河皎
錯認芭蕉作雨聲

病懷

宋玉悲秋日相如臥病時白雲親舍夢黃菊故園思莫療愁腸疾
奚煩折臂醫浮生強調攝珍重在天涯

題畫四絕句

不須魏紫儷姚黃莫誤寒梅聘海棠贏得神仙真富貴一般穠麗
冠羣芳

當筵曲唱紫雲迴滿院花霏絳雪開遮莫摩登天女散一時應有
鳳凰來

柔條踈地拂池塘不省紅樓惹恨長自是靈和風景好紫薇花對
綠衣郎

愛吾廬稿

卷之九

醉園詩存

六

澧浦風光洛浦同水仙移步入蘭叢麻姑偶擲丹砂贈誤染林間
竹實紅

九日卽事口占

尊中少酒籬無菊如此重陽太寂寥最怕登高生客思卻宜今日
雨瀟瀟

客中秋感

搖落天涯暮羈縲感不勝無家遂耕隱有婦作吟朋多病風懷減
悲秋客思增吾生安守拙與世敢模稜

舊業荒三徑巖親滯一官十年遭喪亂萬狀忍飢寒作客曾何補

依人總覺難愁多怯霜鬢引鏡幾回看

木芙蓉

朝華夕漸萎夕萎朝復華有如君子德日新新彌加又如靜女容
洗妝妝愈姸誰言歲晚多風露秋芳獨殿非遲暮不曾冷落怨秋
江共仰繁華倚雲路

菊

三徑荒叢寂寞生九秋纔屆忽敷榮風前雨後神偏韻月下霜中
氣更清不共春芳鬪凡豔獨於晚節傲羣英祇因偶傍陶潛宅錯
被人傳隱逸名

愛吾廬稿

卷之九 醉園詩存

七

次韻酬同幕朱芝仙

偶之吏隱陶元亮快覲遺榮賀季真蔣詡論交蹤落寞朱家結客
氣嶙峋清言似玉能霏屑雅度如冰不染塵嗟我常垂和璞淚謬
煩推作席前珍

題熊氏園

昨曾攜友此徘徊訪菊偏逢菊未開今日再尋三徑到黃花應認
故人來

陶公招飲賞菊卽席放歌

人言不可居無竹我謂更須籬有菊種竹六月生清涼對菊三秋

洗塵俗公家淵明識此心采采獨對南山吟三徑卻做我家意竹
間曾逐羊求至當時未必無此花大抵流傳缺文字于今世癡
好鍾風光常與公家同憶昔承平方幼穉趨庭嬉戲黃金叢家君
繼出謀祿養年年花發兒童長看花未免常思親恨不移花就親
賞一朝戍鼓家山破追隨宦轍愁無那韓愈文章莫送窮杜甫家
風偏忍餓從此無心說種花有花卻感人無家況我飢驅長作客
辭親歲歲羈天涯今夏蒙公遠羅致忽逢佳節生愁思椿萱遙憶
復重闌茱萸徧插思羣季依公幸屬賢主人得毋五柳爲前身十
年作令可也簡吏隱仍與黃花親黃花朝發東籬盆綠醞暮酌北
窗

愛吾廬稿

卷之九 醉園詩存

八

海尊招邀人與花寒溫絕纓容我狂於髻舉杯量隘杯屢捫百川
恨不長鯨吞一醉定拔千愁根免教惜別傷離魂放歌直欲驚天
闔隘視八極雙乾坤衙官瑣瑣何足論如公循吏俗可敦桑麻四
野如雲屯黍苗百里膏雨痕無妨種花滿縣門河陽不異柴桑村
莫言將母田園存羣黎旦夕希公恩南溟未徙搏鵬鯤似余方愧
兗州孫

席間偶道熊園之遊復成一什

城西熊氏園位置頗幽淑四時常著花九秋亦有菊地僻無玉津
城荒乏金谷卽此已擅場稍稍堪娛目公言欲往遊病餘蹇芳躅

若復乘高軒黃花笑人俗豈知彭澤公匡廬契幽獨興至時登山
醉來輒觀瀑常恐筋力衰搜奇苦不足呼兒肩籃輿代步陟巖麓
公盍踵前武驂篠減雙僕我亦願追陪往尋舊詩讀

東湖竹枝詞

半城水色漾漣漪宜雨宜晴態亦奇喚作東湖耦西子臨流低唱
竹枝詞

西山黛接兩峰遙靈應名橋分明似段橋妝點煙波作圖畫杭州人

到也魂銷

清淺常同明鏡看雨餘亦復水瀰漫今年春漲連平地彷彿西湖

愛吾廬稿

卷之九 醉園詩存

九

一半寬

萬柳隄邊柳浪堆百花洲前花港洄野蔬綠徧蘇翁圃不讓孤山

處土梅

觀音亭跨水深深誕日爭朝天竺林羞被輕狂暗偷覷低頭難表

阿農心

間撐小筏當扁舟雪色銀鱗撒網收即願打魚魚比目妾願種蓮

蓮並頭

豫章溝水響淙淙流出城闔江水通水流一去不復返即莫隨流

東又東

擬任彥昇苦熱詩卽次原韻

荷風晨亦清涼不透重軒槐陰午亦濃炎不遮高垣火雲蒸日脚
金電閃天根身入洪鑪台肌沾湘簾温卻羨廣寒迴願倣常儀奔

萬節婦詩 代徐慕袁明府作

黃鵠歌烏鵲詞韓妻陶婦信有之君不見萬節婦漢皋弄珠羌無

耦一解節婦氏陳黃岡人幼讀父書慧絕倫不希鮑妹與左嬪劉向

列女傳班昭七誠文一一大義能具陳二解年十七歸於萬壻曰咸

貞偕婉變敬戒無相違游學勉相勸比翼之鳥連理枝分飛隔別

何曾怨三解壻沒漢江隨周昭王節婦聞之摧肝腸念此兒在抱而

愛吾廬稿 卷之九 醉園詩存

十

舅姑在堂兮未亡人何能亡四解一慟城可崩一望石可化從此姪

娥愛獨居心沈碧海青天夜五解舅曰成經年踰知非奄然邁疾餘

喘絲醫禱迄無效刳股親薦之果然延年一載奇六解庭生孝筍堂

依壽萱舅雖沒而姑存敢曰非芝蘭所託根事姑如舅永矢弗諼

七解有子如駒有女如珠俾之成立慰我兒夫嗣陶孟之芳型兮希

鍾郝之令譽八解後此十年旌揚 詔下貞珉戔戔合光里社我歌

爲詩變周雅願今先貽采風者九解

陶青丞明府輪帑入都邀同北上應京兆舉庚午三月二十

二日發舟南浦卽事書懷爰成四律

忙踏槐黃上 玉京飄然挾策一身輕
蠅緣附驥纔登道鯤要搏鵬
莫計程難得齊姜分袂勸敢同温嶠
絕裾行深知弱體煩親慮
忍聽叮嚀不住聲

信天翁好莫愛煎去是無心或有緣
赴 闕偶隨仙令寫出門先辦孝廉船
不因斲桂方磨斧未到看花且著鞭
賤子平生最蕭瑟 憐才多感丈人賢

綠波南浦掛帆東 指日征塵逐輓紅
走馬青齊瞻岱嶽驅車燕薊覽雄風
壯遊豈賦江淹別得路真忘阮籍窮
叨取郵程送迎便此行端不類飄蓬

愛吾廬稿

卷之九 醉園詩存

十一

一肩行李影蕭蕭 不礙馳驅 帝里遙近
日或能登月窟乘風合便上雲霄
名成早策酬知己才弱還愁棄 聖朝畫壁旗亭渾漫與好從 薰殿聽 虞韶

早渡彭蠡

榜人一時喧掛席 迫晨景征客攬衣起
篷窗足退省曉煙侵澄湖宿雲眷高嶺
狎浪鷗點稀沿隄鶯聲靜清風激奔舸
倏忽凌萬頃前帆去更遙濛濛澹無影

潯陽泊舟

潯浦煙波繞庾樓 篷窗凝望恰停舟
春風綠滿垂楊岸暮雨青迴

短荻洲江漢合流趨大海荆揚分界隔雄州
竭來滿眼腥羶窟不聽琵琶也要愁

九江望廬山賦贈陶明府

年年彭蠡征帆促此日停舟九江曲咫尺廬山不一遊未免匡君
笑人俗暮春三月風雨多萬丈峰高隱飛瀑陰陽變態紛合離徙
倚篷窗靜瞻矚有時雲掩琅玕碧乍若愚公徙王屋有時天放芙
蓉青又如靈鷲來天竺舟中仙吏陶彭澤挂笏同看當畫幅興來
輒欲窮攀躋無奈官程事羈束公方命趨丹闕詔我將策射

金門牘就日凌雲志正殷安得抽身陟巖麓世間萬事有先後莫

愛吾廬稿

卷之九 醉園詩存

三

惜登臨蹇高躅與公直上蓬萊巔歸時餘興名山足

旅夜

欹枕寐還覺中宵情緒紛
春愁生夜雨殘夢斷江雲鼓角悽常聽
琵琶渺未聞征途易憔悴不爲感離羣

舟次卽景

幾日舟停水郭西春深煙雨景淒迷
草隨岸轉青痕曲柳傍江搖黛色
低野雀穿窗疑燕掠沙禽棲樹雜鶯
嘯衍波箋紙雲藍膩鉤取詩情當畫
題

瘦吟篇五十韻

余生多積疴身瘦如枯荻余生有痼癖苦吟生魔災吟苦劇增瘦
神疲意虺隤有時揮百篇濁酒傾一杯有時敲一字金丹鍊千回
空嘔長吉心豈有謫仙才博得杜陵叟飯顆逢朝詬骨肉憐余癡
訓誠復箴規謂非養生術恐成賊性媒感此良自悟沾沾胡爲哉
誓將廢吟詠形質葆且培拌教鐵硯焚不許銅鉢催有如秦始皇
逐客生疑猜又如王將軍體傲遣蛾眉誰知魔糾纏驅去仍相隨
恰如形與影處處偕徘徊去秋喪大母腹痛縈悲哀河魚染舊疾
萌芽至今胎知交有賢令五柳雙溪栽昔承遠羅致琴堂久叨陪
今將謁 紫宸近 光趨棘槐謂余歲大比射策明光開曷不附
愛吾廬稿

卷之九

醉園詩存

三

驥行及時鞭駑駘辱知南阮貧北道艱往來舟車任供億衣食隆
解推珍重憐才意采蘭別南陔努力奮征策抱疴勉相追輕舟發
滕閣信宿九江湄待輓水衡錢十日泊城隈觸發舊吟興貪若羅
珍瑰遂令眠食廢益致形神摧有明重帖括試士同管窺立言代
聖賢孔孟人人爲鐘鼓聽衰歇風雅委蒿萊我 朝始定鼎大綱
攬恢恢制科踵前法增飾待軒羲 純皇嗣振興八韻嚴體裁至
今春秋舉王風無稍衰要不類唐制專試明堂詩情知作李杜未
必掄高魁瘦吟真自苦心血徒虛糜就彼盍舍此文壇練雄師我
思是有命拘枉非通材命當撥巍科文章價自擡豈無儉腹兒龍

門奮風雷命當享遐齡精神古如梅豈無碩膚者北邙化塵埃窮
達與脩短意料焉能該吾終守吾癖安肯心徒灰譜作瘦吟篇吟
到黃金臺

送春

來從何處來去從何處去著意送春行不識春行路春行路多歧
借問無人知東風不解事吹散各天涯莫踏龍堆草斷腸令君惱
莫逐雁塞沙撲面令君老便去不教留願同車與舟 上林無限
好相送到 皇州

詠泊舟處

愛吾廬稿

卷之九

醉園詩存

古

泊處不知名吟情眺望生斷峰銜樹影曲岸拗江聲水遠滄洲闊
沙連浦潏平心閒愛漁父卻傍釣磯行

太白祠

公竟騎鯨去長庚返列星無人繼騷雅有酒醉英靈關塞當年黑
江山曠代青吟成怯高詠愁絕不堪聽

別意

別時無一言別後常惻惻欲託江上魚遺書到君側書中何所云
沈吟自啾唧願汝解離情那能不相憶勸汝加餐飯艱難增旅食
作書還復已悵悵意何極待覓芙蓉鏡寄君照顏色

昨夕攬君袂，喁喁北窗語。不知夢裏逢，誰道離懷苦。無情汝南雞，更有津頭鼓。催曉各分散，頓成關河阻。以我夢還家，知君念羈旅。人生骨肉契，天涯精誠聚。同時應夢余，脉脉遙憐汝。

金陵絕句

送盡東吳復六朝，金陵王氣黯然銷。南唐淚併臙脂血，流作秦淮

上下潮

歌罷春燈二百年，承平風景也堪憐。如何少小經過日，一宿江頭便放船。

愛吾廬稿

卷之九 醉園詩存

五

從軍重泛秣陵舟，猶滯降旛出石頭。憶侍江東橋上立，莫愁疑望不勝愁。

癸亥從戎白下曾侍家嚴上江東橋戍樓望莫愁湖

掃盡烽煙幾度來，江山勝蹟已成灰。今宵到此增惆悵，路繞青谿又一回。

舟中望江南

咫尺金焦隔渺茫，佛狸城畔隱斜陽。暮雲遮斷江南岸，應恐愁人

欲望鄉

瓜州夜泊

入靜孤舟夜寂寥，忽驚急雨響瀟瀟。推篷月滿滄江白，始悟東風

送早潮

早行東青道中

鄉心昨夜濃於酒
眠思今朝懶似蠶
放鴨聲中搖畫牖
夢回恍惚認江南

淮陰釣臺

淮水長流日夜東
高臺樓託想英雄
釣魚未溷逃秦迹
烹狗翻猜滅楚功
尚有千金酬一飯
如何十面困重瞳
禍罹鐘室心方悔
不及垂綸大澤中

征車北發口占

愛吾廬稿

卷之九 醉園詩存

六

乍辭舟楫駕征驂
局促車中太不堪
客路已隨鴻雁北
鄉心還逐鷓鴣南
黃塵面目看人異
白雪情懷遞世甘
何事微名勞役役
道逢耕耦暗生慙

彭城懷古

白日黃沙捲黑風
彭城策騎影濛濛
斬蛇大澤蹤何在
戲馬高臺蹟已空
芒碭山連雲氣外
呂梁石齧水聲中
傷心燕子樓頭事
兒女英雄感慨同

題荏平旅店壁

搖蕩心旌一路飛
停驂逆旅又斜暉
空煩碧玉呈歌扇
祇恨黃塵

浣客衣遠涉頓令眠食減勞生真與性情違京華未到身先悴攬轡如何不憶歸

題腰站驛壁

齊俗依然尙女閭蛾眉列屋自紛如縣駒歌曲春駒夢爭盼纏頭到客車

古驛燈明下騎纔征衫拂拭尙徘徊琵琶不待江州喚翠袖殷勤百抱來

顧曲尊前逸興闌紛紛挾瑟謝邯鄲非關陶穀風情減自是郵亭

少若蘭

調青丞明府

愛吾廬稿

卷之九 醉園詩存

七

苦水舖

關山遠行役勞人心厭苦如何井中水苦與勞人伍水苦由天生非若人自取苦水舖前出得名想伊古誰更苦作甜缺陷強彌補大造有轉移人力豈能主世情愛虛幻翻覆變雲雨畢竟非益泉忌諱笑迂腐萬事苦中得鑒此力自努我願存其真題詩拂塵堵

題留智廟店壁

風塵日日走征車困頓難支倦眼斜只盼停驂眠箇飽漫勞紅袖

撥琵琶

冰簟纔安枕暫欹窗前猶是夕陽時邯鄲未到應無夢一任黃梁

飯孰遲

旅伴相呼舉晚餐一尊濁酒強盤桓漢書未向征途挈且覓新詩

四壁看

懷河間獻王

大雅扶輪百代亡下車猶問漢賢王崇儒特反秦阮例搜籍宏推
魯壁藏肯爲神仙隆道術不教賓客競詞章香薰芝檢芸函地揮
淚千秋灑夕陽

早行

隔宿輿夫戒早行荒雞未唱已登程明明車鐸前途響誰著先鞭
愛吾廬稿

卷之九

醉園詩存

六

似祖生

十二道橋卽目

平楚蒼茫極望遙一川煙水影迢迢程經闔苑三千客隄列揚州
一半橋風定鷓鴣魚上市雨餘鸚鵡稻生苗扁舟容與人何許棖
觸無心意也消

涿州道上

飛沙漠漠擁輕輶散作黃塵沒馬頭日暮征車迷涿鹿尙疑毒霧
障蚩尤

良鄉店書玉堂新客題壁詩後

百尺梧桐引鳳棲錦衣歸客有留題玉京朝罷昇仙去羨煞劉綱
挈小妻

都門雜句

西山黛色接城闔振策遙看馬上身只隔輦紅塵十丈興來蠟屐
幾閒人

玉竦流分太液邊涵濡原共五雲天如何垂釣煙波客登得瀛洲
便是仙

江郎綵筆信通靈揮灑雲煙疊作亭一幅天然好圖畫遠山屏障
四時青

愛吾廬稿

卷之九

醉園詩存

五

古槐龍爪久依稀爲近獅王隱息機祇恐九天雷雨足攬拏終破
碧空飛

金犢車追寶馬輕爭從十刹海邊行蓮花似愛游人看環向銀塘
面面生

舊隊梨園色藝優閒來顧曲每句留怕聞別部新聲按燕趙悲歌
我欲愁

車如流水響滔滔駿馬珊瑚鞭意氣豪瞥觀拳簾人似玉一齊爭看
鄭櫻桃

歌管聲喧賣酒樓五陵俠少聚朋儔隔窗磊塊澆難盡冷落新豐

一馬周

車馬紛紛曲院過輪蹄追逐乞兒多一錢拋擲心都惜不惜千金買笑歌

頗到都官一紙符堅冰暑卻爽肌膚不知附熱朱門者名利心還冷得無

試後出都留別周小棠儀郎

家楣

潘擷珊州守

家鉅

暨同鄉

諸子時尙未揭曉

雲路泥塗判尙遲同行連日促歸期高歌一曲悲難和別酒千觴醉不辭去國身先疑下第無官心早戀明時挽留卻負羣公意猶愛吾廬稿

卷之九 醉園詩存

三

爲殷勤說項斯

回首春明一夢闌關山惆悵路漫漫升沈有命隨緣好去住因人作計難譽我闈中文字勝勞君榜上姓名看他時相憶雲霄迴還擬凌風振羽翰

自天津乘輪舟渡海

舟車利遠行創自軒轅始輪蹄與帆楫疇能移易此近代泰西人精心出奇技造舟駕車輪巧以火濟水火烈能運機水柔斯順軌水火激盪行日夜無停晷周歷環地球重洋輕萬里 皇仁廣懷柔南北許通市朝宗析木津往來便行李我初遠異物附載非得

已牽率有同人欲速遂歸止登舟苦局促升榻患層繁方罍作俎
形寢人比羊豕列屋有洞房但住西人子隆準與深目折腰復齟
齒形狀雖各殊居處競華美飾彼翔鏡鸞困余同柙兕越宿方啟
輪輪行舟怒駛半日出丁沽大海濶迴紫登樓快遐觀憑欄愜俯
視有如雲碓春勢挾山泉起又如星槎浮程向天河指天光接海
光碧白分表裏外此寂無覩萬象歛奇詭但覺淩混茫那知行遠
邇游心沕穆中滄溟一杯耳

曉達吳淞

淼淼吳淞翦不開氣吞渤海亦雄哉輪追日馭扶桑及槎掛星躔

愛吾廬稿

卷之九

醉園詩存

三

析木迴乍覺鯤溟窮島嶼翻疑蜃市現樓臺回頭指點蒼茫笑如
此風波渡海來

醉園詩存卷十

宜興蔣夢齡棠氏著

靖安紀難六首

并序

辛未十二月十七日齋匪乘晨門啓關突入靖安殿官幕
焚廨庫余寓距縣僅數十武尙宴然在夢中長子兆蘭遙
聞呼譟聲方驚疑適權邑丞魏君過門擊扉告因趣一家
起將赴井遇舊姬力阻挈家由東門出行風雪泥淖中屢
蹶屢興凡數里始得一小車載細君閱三宿乃至省垣幼
女甫十齡隨行時以履決不前余令僕返迎竟棄之去女

愛吾廬稿

卷之十 醉園詩存

一

雜本邑婦女中出北門重趼行十餘里過溪渡爲村媪所
留余自省往寬道遇邑丞高君始得其耗因蹤跡攜歸賞
裝百不獲一僅存空篋數事及醉園詩存彙數編其他古
文四卷駢體二卷詞三卷制藝律賦試帖各二三百篇尺
牘千餘篇與外舅儲啓齋師天香樓殘集共扇一篋爲厲
主人徐姓所匿衣物財賄則與逆僕瓜分託言賊掠而賊
實未嘗一至余室先是令尹陶黼昌返自京師意驟滿遇
余亦寢薄余欲去未決忽夢先大父示藥物一束曰此當
歸也旣寤遂辭館以十金畀司帳車君買舟久不應旋聞

齋匪萌動余建議設備不從因擬棄輜重陸行十三日已
登輿矣天忽暴風雪因復止遂羅斯厄署中被害者候補

令一

係奉檄來
治獄者

幕賓四書吏紀綱十餘外則城守弁父子

三局紳二亦同被害百姓死者僅十數人而漆工某因識

賊故八口無子遺令尹及其孥顧皆踰垣遁無一死者且

先期置舟河干夜輒由後垣潛運其貲裝略盡故余舟卒

不可得外示鎮靜竟不爲民社計是非天奪之魄愚不至

此賊僅八十餘卽日爲鄉民焚南門入搜斬幾盡斯時縱

寇者前後奉新令高

卽靖
丞

汪致寇者靖安令陶乃事上高

愛吾廬稿

卷之十 醉園詩存

二

陶僅褫職而汪反以鋪張得優賚詩不備及故特詳敘之

世情惡翻覆人事忌顛倒禍伏有先幾況遇神靈告藥物不當歸

明明速高蹈交誼矧已渝非忘國士報豈知盡室行偏遲出疆導

伏莽暗興戎漸漸風聲到彼昏非不知財力惜輕耗鎮靜以爲名

藩籬撤室奧念舊陳讜言反云太輕躁謀社洵有鬼開門乃揖盜

猶幸懼震驚尙免遘凶暴全家慶生還中心轉傷悼

是時久風雪天色將黎明夢中聞叩扉驚醒已無聲但聽大兒喚

速速逃寇兵倉皇一家起誓擬同死生我攜十齡女婦祿兩月嬰

欲赴井中瀾性命鴻毛輕忽逢舊嫗來勸我東門行謂此尙無賊

僅隔百武程誰知泥淖中纖趾難急行回頭失愛女命僕還相迎
曲巷有歧路勿任迷孤征豈知僕亦杳含愁出重城

出城望城內劫火連天紅城門亦旋閉望女心已窮偕兒掖婦行
泥塗沾厥躬積雪地滑滑飛雪天濛濛可憐千金軀冒雪當寒風
投止向村落十室九已空幸逢鹿車挽賃載行怱怱日暮款茅舍
漂母憐英雄牛衣施卧具獸炭燃薰籠呱呱漸索乳僵凍回春融
獨念掌中珠飄蕩如飛蓬汝生祝安全汝死來夢中

曉行暮復宿三宿至南昌嗟嗟一日程辛苦四日嘗到門狀如鬼
僮僕駭且忙傳呼一家出骨肉相扶將嚴父見兒歸問訊含悲傷

愛吾廬稿

卷之十 醉園詩存

三

慈母見兒歸涕淚流成行羣季集衣屨易我泥塗裝諸妹出釵理
催嫂理殘妝繼知嬌女失一一心悽惶父言孫女小未必懼寇殃
或者倉皇間奔投各一方兒速往尋覓勿任拋他鄉

明發登籃輿從以崑崙僕道逢彼邑丞告我城隍復問女固無恙
詰賊半擒戮惜丞身被創不忍煩言瀆茫茫至彼邑訪女隔溪屋
女云逃寇時履跡迷迨逐遇僕呼不膺掉頭復瞑目失路隨裙釵
出城竄荒谷日旰臨渡頭同行叩邦族村姥聞兒言道是閩中淑
勸兒暫相依朝朝愁滿腹阿爺來何遲語罷吞聲哭

挈女入城郭言往省舊居舊居賊未擾百物奚空虛闔闔復啓

筇相篋亦怯惟吾詩數編棄擲當庭除棄擲本不惜拾得復何如
吾師儲詠詩字字鏘瓊琚昔遭故鄉亂奇零存劫餘今茲復全失
扼腕徒歛歔早知委今日不若渺當初奴輩利吾財安用仇詩書
出門三歎息挈女還登輿歸來逼除夕歡聲溢門閭

九日上高趙逸丞明府

惟熙

招同大觀塔登高

又把重陽客裏過光陰如此易蹉跎病催弱鬢衰將白酒上愁顏
醉已醺佳節常逢歡會少浮生偏滯異鄉多琴堂珍重登高約不
去追隨且奈何

城南有塔試攀躋闢健先登百尺梯絕頂原從平地上昂頭翻覺
愛吾廬稿

卷之十

醉園詩存

四

遠天低山環螺岫千盤合川截虹梁一翦齊別有慈恩最高處姓
名留向日邊題

塔禁人
題名

下方老桂作花纔攀當菜萸插帽來炙獻行廚紛捧榼酒傾滿座
其銜杯盡歡畢竟須乘興隨俗何嘗要避災我似樊川杜書記難
逢笑口者番開

歸途分道返舟車泛鷁飛鳧各自如天際夕陽猶戀客水邊涼意
忽侵裾半江塔影回看渺兩岸燈光入望初最是還家餘興足吟
成叉手繞庭除

赴試白下留別李捷峰廉訪

有序

任彥昇釣魚之地城互雙溪周子隱射虎之鄉家傳二徑
是生小子乃屬名邦雖雅乏英姿辜瑤客壁人之目而飽
餐秀色狎銅官玉女之蹤幼習詩書輒勤誦讀長耽筆硯
尤喜謳吟薄宦從親千里得江山之助弱齡作客一生輕
海嶽之遊意氣煙騰謂青雲其易到情懷雪霽詎紅日之
能消何期生不逢辰遭時多難世無知己歷運偏窮家山
經喪亂之悲宦海共飄零之苦飢能驅我作嫁安辭熱不
因人賃春奚惜屢入郤超之幕頻登王粲之樓白眼相看
素心誰覲遂至神清洗馬不免工愁竟教骨出飛龍徒供

愛吾廬稿

卷之十 醉園詩存

五

善病河魚腹疾拯管井以無方海燕身輕傍雕梁而不去
看年年之紅藥都號將離比歲歲之黃花總言更瘦燕山
走馬八千里曾替人勞章水羈鸞十五載不知官樂赤貧
憤耐素傲難馴幸而天有靈時忽去椰揄之鬼地逢絕處
頭來接引之仙家君既出宰文江賤子亦辭羣錦水鯉庭
趨命樂也融融燕寢承歡歸好好自畫蛾眉於暇日貧
女顏開任拋馬角之流光旅人迹穩不圖下走少啗浮名
無意上陳濱留清聽值蓮帷之乏佐開柏府以延賓鳩鳥
爲媒幸未告余不好鯉魚作媵無須問客何能未陳光範

三書已賞退之之學既遂荊州一識益誇白之才然而
恩重難酬情深徒戀小停一月空煩累重豬肝大比三年
輒奮數奇援臂也知斫桂斧鈍吳剛尤恐穿楊矢虛養叔
磨鐵鍼而亦易曾破工夫登金榜以偏難無憑品第乃見
獵而心猶自喜羨免則蹶未能忘將仲子兮偕行叩須十
日望美人而不見渺若三秋爰當牋記之餘稍肄篇章之
末馬逢伯樂能無昂首長鳴琴遇子期自有俞牙絕調印
雪泥之鴻爪聊記因緣搏雲路之鵬蹤且由造化疊成長
句勉當六鱗更弁微言敢祈雙盼俟余手足著鞭追祖氏
愛吾廬稿

卷之十

醉園詩存

六

先聲嘔此心肝囊錦備公家故事

雲泥位分隔重重浪把浮名動李邕有骨縱能酬市駿無才何敢
望登龍下交束帛勞三聘遠召千旌慶再逢感此深情辭不得慙
然攜笈便相從

一見殷勤說項斯高軒重枉到門馳親如子弟情尤切寵以賓朋
禮特施丹桂期攀明月窟紅蓮催視白雲司寒暄音問晨昏牘珍
重枚生筆一枝

依劉辛苦半生過底事人爲墨所磨叔寶神清愁太重相如體弱
病尤多勤揮短札心拌嘔久擯羣編手倦摩昔本荒蕪今更甚槐

黃忙踏欲如何

尊卑懸絕意彌親未定行期早愴神忙裏光陰經月短劫餘文字

一篇珍

余雙溪之難各稟盡失公索觀制藝僅得近作一篇極承獎許

依公不惜長爲客譽我先

愁少替人士薦曹邱都未信姓名偶得輒相詢

寸心先往舊南畿漫擬千軍筆陣揮便倖成名叨一舉已悲失望

誤重闌青雲勒發中年滯白日戈回綺序非何況升沈難預料空

煩龜筮驗從違

來非草草去恩恩遙指椿庭勉託公十載投閒重作令百年週甲

漸成翁貧能守儉心如水老不忘勤志可風倘爲桑榆培晚景夕

愛吾廬稿

卷之十 醉園詩存

七

陽猶得半天紅

題節母陳太夫人七十壽言册後

節母姓李氏爲津海觀察厯城陳子敬

欽

之母子敬官京

師時值母古稀誕日因未遂萊綵歡徧徵壽言茲母謝世

已久子敬於津海道署追愴徽首彙刊成帙郵寄同人徵

題捷峰廉訪屬余代作

厯山之土舜所耕潁川之族媯所生遙遙華胄莫與京誰歎漢儒

同其名卓哉子敬人中英觀察津海司水衡琅玕貽我數十程分

題兩册瑤籤明北堂古稀會稱觥壽言一一羅公卿開卷擊節讀

且驚乃知賢母苦節貞隴西譚牒輝長庚于歸太邱名未成鹿鳴
纔賦別鵠賡一慟幾欲頽長城誓逐電影追風聲黃泉碧落偕孤
征人言捐軀慎勿輕兒女強半皆孩嬰存亡一息關宗祏嗟嗟吾
志不得行昔日婦兼子職營今日母將父道并督兒太嚴非人情
誰知枕簟淚暗傾賴有長君操奇贏漸覺枯朽回春榮次君射策
尤縱橫雛鳳聲如老鳳清折桂將母母笑迎九泉可對顏無頽從
茲荼苦生飴餵休言祿養虛鼎烹十年郎署寒暑更板輿屢卻心
怛怛于今蕩節臨滄瀛倖過十萬金滿籬愛日苦短人難爭風木
之感何能平卻刊壽言馳八紘徵題如索鍾磬評我思母志非硜
愛吾廬稿

卷之十

醉園詩存

八

硜力回造化屯而亨孝筭根從慈竹萌籜龍高翔百尺莖貢之明
堂爲筭笙聲和感世鸞鳳鳴霜柯雖萎節已呈百年壽比千秋彭
一品之封兩字旌足式寒閨布與荆蓼我請勿悲懷榮致聲難弟
偕難兄

和吳筠軒觀察滕王閣落成登眺原韻

帝子繁華舊蹟空還疑佩玉響瓏窗高霧霽層陰白閣敞霞翻
落照紅斤鑿已脩三界月帆檣應送九秋風怪他劔氣衝牛斗猶
滯飛騰出匣中

吳楚烽煙浩劫收又看勝賞闢荊州

謂劉中丞

淮南招隱王孫宅江左

衡文太子樓或有才人逢九日可無佳話續千秋慙余總角登臨
早二十年來困薄遊

水仙墓近足欽哉

婁賢如墓

絕勝楊花落馬嵬金盃不容千載出玉卮

原道九天來煙波洛浦應無塚雲雨巫山詎有臺抔土獨留借傑
閣憑欄吟望夕陽催

秋水長天一色清沈寥爽送雨初晴洞庭縹緲雲中瑟緱嶺依稀
月下笙便想乘槎三島遠還思歸棹五湖輕悠然極浦漁歌起棖
觸西風無限情

又代捷峰廉訪和筠軒觀察前題

愛吾廬稿

卷之十

醉園詩存

九

一笑登臨眼界空依然傑構勢玲瓏雕甍乍歛墟煙白繡闥曾銷
劫火紅郭外笳聲餘落日江千帆影渺長風扁舟得遇才人至不
吝招邀入座中

舞罷歌闌宴席收尙傳勝蹟冠洪州桂叢那有王孫宅花萼都無
帝王樓雨捲雲飛歸一閣星移物換隔千秋廿年兵燹逢脩復不
負西江作宦遊

複道凌空亦甕哉遠山石磴共崔嵬函關人早騎牛去緱嶺仙遲

跨鶴來

時子姪輩還秦接眷未至極浦林巒迷舸艦芳洲花木隱樓臺吟情思

入蒼茫際遮莫詩成被雨催

黃葉西風爽氣清登高時節半陰晴龍津久躍延平劍鹿野剛吹
小雅笙時省試甫畢此日三秋雙鬢短何年五嶽一身輕東吳季子風
流甚得句先傳傲吏情

附錄次園弟恭代 家大人和筠軒觀察前題

帝子云遙舊蹟空劫餘高閣起玲瓏山光帶雨雲飛白樹色經
霜日射紅題詠流傳才子筆登臨慨想大王風千秋不盡滄桑
感都付漁舟晚唱中

極浦遙山一望收仙人舊館鎮南州紅羊劫後新成市黃鶴江
邊近有樓蚊蜺依稀空復夢雁鴻來往幾經秋廿年長作章門

愛吾廬稿

卷之十 醉園詩存

十

客憑眺無端悵宦遊

傑閣重臨亦壯哉層巒高敞勢崔嵬劒光掣電成龍去帆影連
雲逐雁來太白豪情重把酒少陵秋興獨登臺憑欄祇覺西風
起霜鬢年年白髮催

秋色連波混太清風光難定是陰晴鎮蛟空賸千年柱跨鶴曾
聞五夜笙煙雨低飛孤鷺重水雲閒泛野鷗輕重聯勝友開文
讌都督憐才倍有情

附錄兒子兆藹和筠軒觀察前題

徙倚憑欄極望空雕甍百尺聳玲瓏練圻遠水當窗白綺散餘

霞繞檻紅帝子不來虛舊蹟才人已去渺長風而今閣畔重回
首無限思量夕照中

翠疊層巒眼底收依然勝境復洪州金鋪重列雙鴛闥綵筆新
脩五鳳樓南浦波光紅日暮西山黛色白雲秋檐前風動金鈴
響疑是鳴鑿帝子遊

桂殿蘭宮勢鬱哉遠山重疊又崔嵬干霄塔影摩檐出繞郭江
光入檻來座上燕脩閣伯嶼圖中蜨化祝英臺漁舟驚起眠沙
鷺不住鳴榔向晚催

西風蕭瑟入簾清黃葉丹楓傲晚晴惜遇良時罷歌舞愧無雅

愛吾廬稿

卷之十 醉園詩存

十一

奏協竽笙心隨江上閒鷗淡身似天邊旅雁輕少小家山渾未
識登高猶動故園情

袁太夫人壽詩代捷峰廉訪作

太夫人姓郭氏中州淮甯人歸項城贈光祿大夫袁公生

四子次端敏公諱甲三字午橋由進士官儀曹歷臺諫以

戰績游陟鄉垣領節鉞歿於豫軍子保恆字筱午以學士

督左恪靖伯軍儲平定回逆晉秩宮詹同治癸酉太夫人

春秋九十有七大吏以 開奉 優詔旌異 敕建百歲

坊宮詹乞假上壽並徵詩文

司徒門閥久推袁芝有根芽醴有源兩世科名班玉筍 三朝恩
寵護金護傳經業顯明慈訓恤緯忠酬賚 帝言此日中天瞻婺
宿榮光遙徹 紫微垣

當年茹檠矢貞操豈意榮華百歲遭四鳥蹤隨雲外舉一夔 恩

早日邊叨北征彥伯騎鯨背東觀超宗有鳳毛策佐嫖姚平絕域

已收天馬貢蒲萄

九天錫類有輝光 詔許榮旋侑舉觴一表陳情今令伯百年介

壽女汾陽夫人城畔風雲壯王母池邊日月長豈獨東園班四皓

門庭青紫久成行 太夫人築堡禦寇有年
四子十孫多以軍功顯

愛吾廬稿 卷之十 醉園詩存

三

仁靜由來本壽資中州施濟徧鴻慈百齡肯使初心倦一佛能開
衆口飢家散千金欣質珥門高萬石慶含飴卽今食報期頤屆猶
是桑榆未晚時

日本使定議出都案周小棠京卿贈詩公餘退食走筆立成

余因隨侍入觀假館寓齋得觀染翰步韻二章奉贈

香山長慶集聲價重雞林曠代傳佳話惟君有嗣音中朝資柱石

異域訂苔岑不愧平西後艱難任獨禁

早裕匡時略班遷九列遲和戎紆至計卻敵仗嚴辭羽獵長楊賦

商音采杞詩微言寓忠憤應使遠人知 日本與臺灣生番構兵遣
使來京有要求挾制意京

卿與文博川相國力持定見始予撫卹還師然已猶以爲憾詩中頗寓忠憤故及之

許仲弢觀察鈴身 觀余題贈京卿詩詫爲敏捷且謂能再立

就兩章否因疊前韻奉贈

長安傾盡日棲託其喬林月旦勞延譽風騷感賞音閱人空眼界

憂國歛眉峯衮衮尙書業仔肩力自禁

君爲眞生先生詰嗣

乘槎經對馬海外昔棲遲破浪雄何極窮源遠不辭方音解重譯

程歷記新詩莫恨相逢晚晨昏似舊知

周孝侯射虎斬蛟歌贈小棠京卿

白額虎啞人南山之巔同惡乃有蛟出没荆溪淵桓桓孝侯君之

愛吾廬稿

卷之十

醉圃詩存

三

先使氣任俠剛少年津亭竊聞父老歎俯首不語心忤然腰間抽
大羽一發殪猛虎手中掣寶刀一舉殛惡蛟敬謝父老姑滅此一
患未除吾則恥折節遂與機雲遊學成文武躋通侯丈夫不惜邊
野死惜汝長城壞萬里塵沙委棄骨不收衣冠抔土空千秋噫嘻
乎昔時猛虎在深山今日猛虎當天關昔時惡蛟蟄淵水今日惡
蛟攪滄海猛虎惡蛟且日多侯今不作可奈何侯今不作賴君作
推轂應煩文彥博願君射日挽強弓願君破浪乘長風虎兮蛟兮
敢相抗封侯萬里家聲尙

代小棠題沈仲復觀察

秉成

鯨研廬圖

有序

觀察浙之歸安人由丙辰進士累官侍讀擢常鎮通海道
調江海關道歲丙寅在都中購得一石命工剖之中有魚
形鱗鬣畢肖因製爲合研如此目然越歲餘其同館桐鄉
嚴緝生辰以其妹歸君爲繼室工詩善畫書法亦道婉爰
作鰈研廬以誌因緣張子青制軍爲之作圖何子貞亦史
題首并爲銘徧徵題詠值京卿方議倭人事倩余爲之捉
刀焉

客從海上寄雙魚中有初明尺素書豔說奇緣徵片石嘉名筆錫
愛吾廬廬中地擅娜嬛福燕婉人如魚比目不須新婦配參軍怡

愛吾廬稿

卷之十

醉園詩存

古

似秦嘉耦徐淑憶昔媼盟未締時郎君棠鵲占高枝課分芸牒登
瀛早染翰朝朝傍墨池元章癖好因耽研長安市上徵求徧覓得
良材太璞完蘊將奇質清光炫雅製煩催匠石攻非誇鸚眼耀雙
瞳金刀試剖魚形出鱗鬣分明在水中魚遊在水忽在石恍如月
孕蟾蜍魄琢就珍同鮫室珠裝成寶若龍宮璧涵濡墨妙擅無倫
惜少瑤窗共研人未覩綵鸞書韻本每看錦鯉詠絲繒良媒紅葉
眞難得支機賴有君平識爲感牽牛尙獨居遂教織女諧新特嚴
徐沈宋本同羣有妹才華勝左芬卻扇便觀香茗集披帷能誦彈
蕉文閨房靜好原無欲鬪畫聯吟肩倚玉人同魚水兩難分琉璃

匣啓含情矚拂拭端溪瀋麝煙銀鱗相比故依然憑將石上精魂
態證取閨中翰墨緣外臺轉徙臨江海結廬每共官齋改題榜因
將鏤研標繪圖更有鸞牋在一時徵詠徧名流長吉囊中句盡收
我比君苗焚研久恐嘲魚目混珠投

次韻酬金元直中翰

星桂

贈作卽送之嶺南

鴻濛共泛舟詩格論千秋客路經牛斗名場閱蜃樓我希王勃侶
君作陸生傳何日長安道重逢慰別愁

題江南會館義園徵久錄

恭代

家大人作

飛蓬辭故枝蹤分故枝絕人生去故鄉心繫故鄉切所以故鄉人
愛吾廬稿

卷之十

醉園詩存

五

欣聚異鄉轍但恐異鄉身遠附故鄉列相逢不相識相見輕相別
是非氣誼疏良由歡會缺欲厚故鄉情班荆仰前哲

班荆茲何地洪州瀆城闔江南客星聚築館鄰仙人鶴背分腰纏

濟以廉泉均堂成祀四賢

閔子言子范
文正朱子

桑梓儀型親歲時展拜覲

履烏交芳茵劇飲恣歡樂錯坐無主賓團團西江月藹藹江南春
杜陵有奢願廣廈千萬間大庇天下士一一俱歡顏願奢苦不遂
民物空相環何如異鄉人託庇同故關粉榆多美蔭適館相追攀
不見滄波萍猶聚南浦灣獨憐弱草塵先委北邙山

歎逝盡陸機感舊深向秀逝者如斯夫園廛允宜購背郭營殯宮

風雨嚴蔽覆近郊闢叢壙泉壤度深厚彼待麥舟豐此掩桐棺陋
他鄉多鬼雄憑陵聚相救山陽笛裏人還應念鄉舊

我家周處邑來寓梅仙宅自折陶令腰久駐王喬舄念與故鄉違
同是異鄉客欣逢此盛舉分俸佐籌策側聞勒成書紀事壽金石
碑題黃絹黃詩籠碧紗碧吟成讓青蓮先奪騷壇席

李蘭墅同寅
先示新詠

養生歌

古今十萬八千歲人生其間不百年問誰不受歲月促寓形宇宙
長流連秦皇昔時踞六合意氣猛若雷霆顛目無三皇五帝籍摧
燒一炬成寒煙雄心未艾骨垂朽幻作奇想求神仙不死之藥謂

愛吾廬稿

卷之十 醉園詩存

六

可致詔令採自三山巔徐市飄然去不返輶轅納魄歸黃泉祖龍
遙遙漢武出大略雄才相後先威行漠北意未已又從西域開窮
邊卻愁馳騫八極隘輒欲富貴千年延飛廉桂觀互空起金盤露
涸天漿鮮文成五利既誅殛海上還候蓬萊船嗚呼海上還候蓬
萊船五柞宮中萬乘捐乃知神仙本荒幻長生那得求真詮就令
安期羨門輩與我覲面相周旋雲中招手下鸞鶴扶將白日昇青
天仙家光陰亦草草千年七日何茫然不若將身委造化一隨物
運同推遷假如日月在天地亦有盈昃偕虧圓動而川瀆靜山嶽
豈無泛濫和崩驚何況人生血肉體不與金石同其堅七情交戰

萬事役削鑿已失天真金丹縱可玉顏駐形神亦復成拘牽惟
有清心節嗜欲勿使外物爭夤緣天與天奪天則定吾生吾葆吾
能專彭殤難齊物之數歿壽不貳誰之權悟此卽得養生法不學
神仙學聖賢

立夏後一日偕李蘭墅周蓮叔兩大令徐少農司理黃海帆

畫士赴鄧埠章山兩義阡繪圖卽事次蓮叔韻

恭代家大人作

連朝微雨送殘春霽色初迎出郭人兩地煙墟尋馬鬣半天雲氣
濛魚鱗攜朋誼溯鄉關舊壑旅謀成宅兆新爲倩黃筮傳畫筆不
辭原陘眺

愛吾廬稿

卷之十 醉園詩存

七

次第登臨命僕夫兩邱相近不嫌孤星霜閱歷形防改風景描摹
致足殊莫笑人情渾似紙須知鬼趣亦成圖路歧乃有亡羊感憫
彼肩輿力已劬

泉流地脈繪宜分相度頻勞日又曛龍接西山迴疊嶂鳥歸南浦
帶閒雲踏歌蒿里攜中聖脩禊蘭亭讓右軍小集祇園還有約况
兼樵唱晚來聞

伴侶相將取道歸重城暝色已霏微未妨小飲情還暢且幸同儕
志不違里閭枌榆思結社墓門松柏盼成圍更期江表人同壽莫
向遼東化鶴飛

小園卽事

三兩亭軒合壺天結構精縱輪邱壑迴聊勝市廛清屋借藤蘿補
階隨薜荔榮榴花交幄吐藥草傍蹊生虛擬奇峰疊偏教怪石傾
柏欹蒼幹禿薇綴紫茸盈舊壘無歸燕新巢有乳鶯業存園之主
寓久客多情每挈兒童戲還偕伴侶行心閒憑寄託身懶避逢迎
觴詠留吾輩絃歌罷老成簷挑蛛網密桁曬蜨衣輕薄日滋蘭性
高風吼樹聲敲詩忘晝暝展帖愛時晴露徑重陰晦雲窗五色明
習池憐未鑿渾欲滌塵纓

愛吾廬稿

卷之一

醉園詩存

六

